

Na osnovu člana 184. Zakona o krivičnom postupku Bosne i Hercegovine ("Službeni glasnik BiH", broj 36/03, 26/04, 63/04, 13/05, 48/05, 46/06, 76/06, 29/07, 32/07, 53/07, 76/07, 15/08, 12/09, 16/09 i 93/09), ministar pravde Bosne i Hercegovine donosi

PRAVILNIK O KAZNENOJ EVIDENCIJI

Član 1.

(Predmet)

Ovim pravilnikom uređuje se način vođenja kaznene evidencije za lica osuđena za krivična djela propisana Krivičnim zakonom Bosne i Hercegovine kojima je krivičnu sankciju izrekao Sud Bosne i Hercegovine i za lica osuđena od inostranog suda ako je presudu priznao Sud Bosne i Hercegovine.

Član 2.

(Sadržaj podataka koji se upisuju u kaznenu evidenciju)

Kaznena evidencija sadrži: lične podatke o učiniocu krivičnog djela, podatke o izrečenoj kazni, mjerama sigurnosti, uvjetnoj osudi i osudi kojom je učinilac krivičnog djela oslobođen od kazne, presudi kojom je utvrđeno da je djelo počinjeno u stanju neuračunljivosti, pravnim posljedicama osude, naknadnim promjenama podataka o osudi koja je unesena u kaznenu evidenciju (djelovanja vanrednih pravnih lijekova, amnestije ili pomilovanja), kao i podatke o izvršenoj kazni i o brisanju upisa osude.

Član 3.

(Organ nadležan za vođenje kaznene evidencije)

(1) Kaznenu evidenciju vodi:

- a) organ nadležan za unutrašnje poslove u općini na čijem području je lice rođeno - za državljane Bosne i Hercegovine, kao i za strane državljane i lica bez državljanstva (u daljnjem tekstu: stranci) koji su rođeni na teritoriji Bosne i Hercegovine;
- b) organ nadležan za unutrašnje poslove u općini na čijem području je naknadno izvršen upis u knjigu državljana - za državljane Bosne i Hercegovine rođene u bivšim republikama SFRJ ili inostranstvu.
- c) organ nadležan za unutrašnje poslove u općini sjedišta Suda Bosne i Hercegovine koji je donio prvostepenu presudu - za strance i za lica čije je mjesto rođenja nepoznato koja učine krivično djelo na teritoriji Bosne i Hercegovine.

(2) Sud Bosne i Hercegovine dostavlja pravosnažnu presudu organu nadležnom za unutrašnje poslove.

Član 4.

(Način vođenja kaznene evidencije)

(1) Kaznena evidencija vodi se po sistemu kartoteke.

(2) Za svako osuđeno lice vodi se poseban karton, u koji se upisuju sljedeći podaci:

- a) prezime i ime, a za udate žene i djevojačko prezime, nadimak ili lažno ime, datum rođenja, prezime i ime roditelja i djevojačko prezime majke;
- b) matični broj;
- c) mjesto i opština rođenja, a za lica rođena u inostranstvu - i država;
- d) državljanstvo;
- e) zanimanje;

- f) prebivalište, odnosno boravište, s adresom stanovanja u vrijeme izvršenja presude;
 - g) naziv suda i općine na čijoj se teritoriji sud nalazi, a za strani sud - naziv države, broj i datum prvostepene odluke koja je postala pravosnažna, odnosno drugostepene odluke ako je tom odlukom preinačena prvostepena odluka;
 - h) zakonski naziv krivičnog djela sa navođenjem člana, stava i tačke zakona koji je primijenjen;
 - i) vrsta kazne i mjere sigurnosti koje se unose u kaznenu evidenciju, sa podatkom u kojem trajanju je krivična sankcija izrečena;
 - j) sve promjene u vezi s upisanim podacima, sa nazivom organa koji je donio odluku i podatke o toj odluci.
- (3) Pored podataka iz stava (2) ovog člana, kaznena evidencija sadrži i raspoložive podatke o osudama koje su izrekli strani sudovi državljanima Bosne i Hercegovine i strancima stalno nastanjenim u Bosni i Hercegovini.
- (4) Ako se prezime i ime lica koje se uvodi u kaznenu evidenciju izgovara drugačije nego što se piše, a izgovaranje tog imena je poznato, formiraće se poseban karton po izgovoru (fonetski), s tim što će se na tom kartonu naznačiti veza sa kartonom na kojem je stavljeno njegovo lično ime onako kako se piše.
- (5) Odredbe st. (2), (3) i (4) ovog člana shodno će se primjenjivati i kad se kaznena evidencija vodi po sistemu automatske obrade podataka.

Član 5.

(Osnov za upis podataka)

Upis podataka u karton kaznene evidencije vrši se na osnovu podataka iz pravosnažne sudske odluke po odredbama ovog pravilnika.

Član 6.

(Organ nadležan za dostavljanje podataka)

- (1) Podatke koji se upisuju u kaznenu evidenciju nadležnom organu za vođenje kaznene evidencije dostavljaju:
- a) podatke o zakonskom nazivu krivičnog djela, sa naznačenjem člana, stava i tačke zakona koji je primijenjen i o vrsti i visini kazne i vrsti mjere sigurnosti iz pravosnažne presude, kao i sve promjene u vezi s tim podacima- Sud Bosne i Hercegovine;
 - b) podatke o davanju amnestije, odnosno pomilovanja – Sud Bosne i Hercegovine nakon što mu nadležni organ dostavi odluku o davanju amnestije, odnosno pomilovanja;
 - c) podatke iz pravosnažnih osuđujućih sudskih presuda koje su izrekli strani sudovi - organ koji je primio te podatke od stranog suda (organa);
 - d) podatke o izvršenoj kazni - organ nadležan za izvršenje kazne;
 - e) podatke o obustavi postupka izvršenja kazne – Sud Bosne i Hercegovine nakon što donese odluku o obustavi postupka izvršenja kazne.
- (2) Sud Bosne i Hercegovine, odnosno organ iz tački c) i d) stav (1) ovog člana dužan je da podatke koji se upisuju u kaznenu evidenciju dostavi organu nadležnom za vođenje kaznene evidencije u roku do 15 dana od dana kad je nastala činjenica koju treba upisati, odnosno od dana kad je o postojanju takve činjenice obaviješten.

Član 7.

(Izvršenje mjera sigurnosti)

Ako je izrečena mjera sigurnosti za čije izvršenje nije nadležan organ koji vodi kaznenu evidenciju, poslije upisa podataka u kaznenu evidenciju dužan je o tome izvijestiti organ koji je nadležan za njeno izvršenje.

Član 8.

(Brisanje osude)

Organ nadležan za vođenje kaznene evidencije brisaće osudu iz kaznene evidencije na osnovu rješenja o brisanju osude iz kaznene evidencije, odnosno pravosnažne sudske odluke o brisanju osude, ili na osnovu odluke organa nadležnog za davanje amnestije ili pomilovanja kojom se određuje brisanje osude.

Član 9.

(Nadležnost organa za dostavljanje podataka za brisanje osude)

Organu nadležnom za vođenje kaznene evidencije, radi brisanja osude iz kaznene evidencije, dostaviće:

- a) pravosnažno rješenje o brisanju osude iz kaznene evidencije - organ unutrašnjih poslova nadležan za donošenje rješenja, ako taj organ nije istovremeno nadležan i za vođenje kaznene evidencije;
- b) pravosnažno rješenje Suda Bosne i Hercegovine o brisanju uvjetne osude iz kaznene evidencije, odnosno pravosnažnu odluku Suda o brisanju osude iz kaznene evidencije na molbu osuđenog - Sud Bosne i Hercegovine;
- c) odluku o davanju amnestije, odnosno pomilovanja, kojom se određuje brisanje osude – Sud Bosne i Hercegovine nakon što mu nadležni organ dostavi takvu odluku.

Član 10.

(Brisanje osude po službenoj dužnosti)

- (1) Organ nadležan za vođenje kaznene evidencije po službenoj dužnosti provjerava u kaznenoj evidenciji da li su protekli rokovi propisani zakonom za brisanje osude iz kaznene evidencije.
- (2) Ako organ nadležan za vođenje kaznene evidencije utvrdi da su protekli rokovi propisani za brisanje osude iz kaznene evidencije, a taj organ je istovremeno nadležan i za donošenje rješenja o brisanju osude iz kaznene evidencije, provešće postupak za brisanje osude iz kaznene evidencije.
- (3) Ako za donošenje rješenja o brisanju osude iz kaznene evidencije nije nadležan organ koji vodi kaznenu evidenciju, taj organ će obavijestiti organ nadležan za donošenje rješenja o brisanju osude iz kaznene evidencije, da je protekao rok za brisanje osude iz kaznene evidencije.

Član 11.

(Tajnost podataka)

Kaznena evidencija i akti na osnovu kojih se vrši upis podataka u kaznenu evidenciju predstavljaju službenu tajnu.

Član 12.

(Davanje podataka iz kaznene evidencije)

Organi nadležni za vođenje kaznene evidencije mogu davati podatke iz kaznene evidencije samo na osnovu zahtjeva i pod uvjetima propisanim zakonom i podzakonskim aktom kojim je vođenje kaznene evidencije propisano na nivou entiteta.

Član 13.

(Stupanje na snagu)

Ovaj pravilnik stupa na snagu osmog dana od dana objavljivanja u "Službenom glasniku BiH".